

SAMÞYKKT

um lokunartíma sölubúða og sölustaða í Ólafsvík.

1. gr.

Sölubúðum í Ólafsvík skal lokað eftir því, sem ákveðið er í 2., 3. og 4. gr. samþykktar þessarar. Sama gildir um sölustaði, þar sem innlendur varningur er hafður á boðstólum og hans ekki neytt á staðnum. Benzín- og olíustöðvar og lyfjabúðir eru undanþegnar ákvæðum samþykktar þessarar.

2. gr.

Alla virka daga ársins skal sölubúðum og sölustöðum lokað eigi síðar en klukkan 18.00 og þær eigi opnaðar aftur fyrr en klukkan 08.30 næsta virkan dag. Þó skulu vera þær undantekningar frá þessu er nú skal greina:

Aðfangadag jóla og gamlársgangur skal sölubúðum og sölustöðum lokað eigi síðar en kl. 13.00 síðdegis, síðasta virkan dag fyrir aðfangadag jóla er heimilt að halda sölubúðum og sölustöðum opnum til kl. 24.00, svo er og heimilt að hafa opið til kl. 22.00 einn virkan dag á undan þessum degi, skömmu fyrir jól.

Á tímabilinu frá 1. maí til 31. des. skal á laugardögum loka sölubúðum og sölustöðum eigi síðar en klukkan 12.00. Á tímabilinu 1. jan. til 30. apríl skal á laugardögum lokað eigi síðar en klukkan 13.00.

Á föstudögum mega sölubúðir vera opnar til kl. 19.00.

3. gr.

Á helgidögum þjóðkirkjunnar, sumardaginn fyrsta, 17. júní, 1. maí og fyrsta mánudag í ágúst, skulu engar sölubúðir eða sölustaðir vera opnir.

4. gr.

Frá ákvæðum um lokunartíma sölubúða og sölustaða í samþykkt þessari, skal sú undanþága vera, að brauðsölubúðum og mjólkurbúðum má halda opnum eingöngu til sölu á brauði, kökum og mjólk, rjóma og skyri, sem hér segir:

Almenna helgidaga, sumardaginn fyrsta, 17. júní og fyrsta mánudag í ágúst frá klukkan 09.00 til klukkan 12.00, þó skal loka páskadag, jóladag og nýársdag svo sem öðrum búðum.

Aðfangadag jóla, gamlársgangur og fyrsta sunnudag í sjö vikna föstu frá klukkan 09.00 til klukkan 16.00.

Alla laugardaga frá kl. 09.00 til kl. 16.00.

5. gr.

Hreppsnefnd getur leyft að vikið sé frá ákvæðum lokunartíma sölubúa þegar um er að ræða:

- Verzlanir eða söluturna, sem selja varning út um söluop gegn sérstöku leyfi hreppsnefndar.
- Veitingastaði er samkvæmt sérstöku leyfi hreppsnefndar selja vörur, sem ekki er ætlað að neyta á staðnum.

Eftir að hreppsnefnd hefur gefið út leyfi, sbr. a-lið, er slíkum leyfishafa heimilt að verla með eftirtalda vöruflokka, enda sé umbúnaður vöru og fyrirkomulag allt háð samþykki lögreglustjóra og heilbrigðisnefndar:

Kort, frimerki, dagblöð, tímarit, ritföng, rafmagnsöryggi, nýja ávexti, ís, sælgæti, tóbaksvörur, eldspýtur, öl, gosdrykki, heitar pylsur, rakblöð, raksápu, hand-

sápu, tannkrem, tannbursta, rafhlöður, rafmagnsperur, spil, skyndiplástur, greiður, dömubindi, kvensokka, vinnuvettlinga, filmur og sóglæraugu.

Sala á þessum stöðum má fara fram frá klukkan 08.00 til klukkan 23.30 á virkum dögum og á helgidögum frá klukkan 14.00 til 23.30, þó skal lokað á föstudaginn langa, páskadag, hvítasunnu, aðfangadag jóla og jóladag, sbr. 4. gr.

Hreppsnefnd getur sett nánari reglur um leyfi til verzlunarreksturs samkv. þessari grein, bundið það þeim skilyrðum, er hún telur nauðsynleg.

Fyrir slíkt leyfi skal greiða árlegt gjald til hreppssjóðs krónur 5000.00 á ári er greiðist fyrirfram fyrir hálf ári í senn. Ef leyfishafi er ekki jafnframt eigandi þess húsnæðis, sem sala fer fram í, getur hreppsnefndin sett það skilyrði fyrir veitingu leyfis, að eigandi ábyrgist greiðslu gjaldsins. Gjaldið má innheimta með lögtaki.

6. gr.

Eftir lokunartíma sölubúða og sölustaða er óheimilt að selja á strætum úti og torgum eða annars staðar utan sölustaða og sölubúða nokkurn þann varning, sem ekki má selja nema samkv. verzlunarleyfi. Farandsalar og vörumarkaðir, sem selja vilja vörur í Ólafsvík, verða að fá samþykki hreppsnefndar hverju sinni, enda hafi þeir opinber skilríki, er sanni, að þeir hafi verzlunarleyfi til slíkrar sölu, hvar sem er á landinu. Um þessa aðila gildir samþykkt þessi, ef sala er leyfð. Slíkt leyfi skulu háð því, að viðkomandi aðilar greiði aðstöðugjald samkv. lögum nr. 51 10. júní 1964, um tekjustofna sveitarfélaga.

7. gr.

Menn, sem komnir eru inn í sölubúð eða sölustað fyrir lokunartíma, er heimilt að afgreiða eftir að lokað er.

Heimilt er að selja bátum eða skipum eftir lokunartíma, veiðarfæri, olíu, vistir og aðrar nauðsynjar.

8. gr.

Lögreglustjóra er heimilt, þegar sérstaklega stendur á, að veita undanþágu frá samþykkt þessari fyrir einstaka daga og til þess að sala fari fram í góðgerðarskyni, eða til ágóða fyrir stofnanir eða fyrirtæki, sem að dómi lögreglustjóra horfa til almenningsheilla.

9. gr.

Brot gegn samþykkt þessari varðar sektum frá 200.00—1000.00 krónum og renna sektirnar í sveitarsjóð. Mál út af brotum gegn samþykkt þessari skal reka sem almenn lögreglumál.

Samþykkt þessi, sem hreppsnefnd Ólafsvíkurhrepps hefur samið og samþykkt samkvæmt lögum nr. 17 1. febr. 1936, staðfestist hér með til þess að öðlast gildi þegar í stað, með þeim takmörkunum þó, sem lög nr. 45 15. júní 1928, um almannafríð á helgidögum þjóðkirkjunnar setja og birtist til eftirbreytni öllum, sem hlut eiga að máli.

Jafnframt er felld úr gildi samþykkt um lokunartíma sölubúða og sölustaða og takmörkun á vinnutíma sendisveina í Ólafsvík nr. 60 frá 10. apríl 1957.

Félagsmálaráðuneytið, 9. marz 1966.

F. h. r.

Hjálmar Vilhjálmsson.

Gunnlaugur Þórðarson.